



Bal kummt Weihnacht´n

Wenn d´Martinsgans g´essn is
und Doch kirza wern
da Bauer zam g´orbat hot
und da Andrési-Moak vorbei is –
kummt bal Weihnacht´n.

Wenn d´Barbara-Zweig zam g´richt wern
da Niklaus dou g´wen is,
wenn d´Wasserlachern zou g´frais´n
und a schneima a-fangt –
kummt bal Weihnacht´n.

Wenn se Kinda vo da Luzi fircht´n
und vom Dama mit´n Hamma,
wenn´s Blätzl-Bacha a-gaiht und
vom Adventskalenda schou fast alle Dierln offen han –
kummt bal Weihnacht´n.

Wenn alle Weihnachtsfeiern vobei han
vom Frauenbund, vo da Feierwehr und vo da Firma,
wenn d´Leit nu mehra renna
und eahnerne letzt´n G´schenka kafa –
kummt bal Weihnacht´n.

Wenn en da Stood d´Festbeleichtung ei-g´schaft wird
und en de Kaufhaisa Weihnachtslieda g´spüt wern,
wenn da Christkindl-Moak a-ganga is
wou´s nou Wirscht, brannte Mandeln und nou Glühwei raicht –
kummt bal Weihnacht´n.

Wenn d´Muatta alle Fensta butzt hot
und da Vatta en Christbaam holt,
alle Backl´n af Post trog´n han
und d´Weihnachtskoaten g´schriem wern main –
is **des** unsa Weihnacht´n?

Wenn´st de niat b´sinnst
und so weida rumpelst,
wenn´st as Strein niat af-hesst mit´n Nachban
und nimma woast, was am Heilig´n Oumnd g´schiat –
kummt fir di **koa** Weihnacht´n!

